

佛教法相學會

The Dharmalakshana Buddhist Institute


60

周年紀念公開講座系列：唯識思想 ●

無心五位

陳森田 老師

2025年8月1日

A photograph of a white mushroom with a thin stem growing from a lush green mossy mound. The background is dark and blurred. The text is overlaid on the right side of the image.


意識常現起，除生無想天，
及無心二定、睡眠與悶絕。




無想天者謂修彼定，
厭麤想力，生彼天中，
違不恒行心及心所，
想滅為首，名無想天，
故六轉識於彼皆斷。



有義彼天常無六識，
聖教說彼無轉識故，
說彼唯有有色支故，
又說彼為無心地故。



有義彼天將命終位，
要起轉識然後命終，
彼必起下潤生愛故。



瑜伽論說，後想生已，
是諸有情從彼沒故。
然說彼無轉識等者，
依長時說，非謂全無。

有義生時亦有轉識，
彼中有必起潤生煩惱故，
如餘本有，
初必有轉識故。




瑜伽論說，
若生於彼，唯入不起，
其想若生，從彼沒故。
彼本有初，
若無轉識如何名入？
先有後無乃名入故。






決擇分言，
所有生得心心所滅名無想故，
此言意顯彼本有初，
有異熟生轉識暫起，
宿因緣力，後不復生。

由斯引起異熟無記
分位差別，說名無想。
如善引生二定名善。
不爾，轉識一切不行，
如何可言唯生得滅？
故彼初位轉識暫起。




彼天唯在第四靜慮，
下想麤動難可斷故，
上無無想異熟處故。

即能引發無想定思，
能感彼天異熟果故。



及無心二定者，
謂無想、滅盡定，
俱無六識故名無心。



無想定者，
謂有異生伏遍淨貪，
未伏上染，
由出離想作意為先，
令不恒行心心所滅，
想滅為首，立無想名。
令身安和，故亦名定。

此定唯屬第四靜慮。
又唯是善，彼所引故。
下上地無，由前說故。
四業通三，除順現受。




有義此定唯欲界起，
由諸外道說力起故，
人中慧解極猛利故。
有義欲界先修習已，
後生色界能引現前，
除無想天至究竟故。
此由厭想，欣彼果入，
故唯有漏，非聖所起。

滅盡定者，謂有無學，或有學聖
已伏或離無所有貪，上貪不定。
由止息想作意為先，令不恒行、
恒行染污心心所滅，立滅盡名。
令身安和故亦名定。
由偏厭受、想，亦名滅彼定。

此定初修必依有頂，遊觀無漏為加行入。
次第定中最居後故，雖屬有頂而無漏攝。
若修此定已得自在，餘地心後亦得現前。
雖屬道諦而是非學非無學攝，似涅槃故。

■ 此定初起唯在人中，佛及弟子說力起故，
人中慧解極猛利故。
後上二界亦得現前，鄔陀夷經是此誠證，
無色亦名意成天故。
於藏識教未信受者，若生無色不起此定，
恐無色、心成斷滅故。
已信生彼亦得現前，知有藏識不斷滅故。




要斷三界見所斷惑方起此定，
異生不能伏滅有頂心心所故。
此定微妙，
要證二空隨應後得所引發故。




若諸菩薩先二乘位
已得滅定，
後迴心者，
一切位中能起此定。

若不爾者，或有乃至七地滿心
方能永伏一切煩惱，
雖未永斷欲界修惑，
而如已斷，能起此定，
論說已入遠地菩薩方能現起滅盡定故。



有從初地即能永伏一切煩惱，
如阿羅漢，
彼十地中皆起此定，
經說菩薩前六地中亦能
現起滅盡定故。



無心睡眠與悶絕者，
謂有極重睡眠、悶絕，
令前六識皆不現行。




疲極等緣所引身位違
前六識故，名極重睡眠。
此睡眠時雖無彼體，
而由彼、似彼，
故假說彼名。

風、熱等緣
所引身位亦違六識，
故名極重悶絕。
或此俱是觸處少分。
除斯五位，
意識恒起。




正死、生時亦無意識，
何故但說五位不行？

應說死、生即悶絕攝，
彼是最極悶絕位故。



此顯六識斷已，
後時依本識中自種還起，
由此不說入無餘依。



此五位中異生有四，
除在滅定。

聖唯後三，
於中如來、
自在菩薩唯得存一，
無睡、悶故。

謝謝！

